

四庫全書

集部

# 欽定四庫全書

集部  
小鳴稿卷三

詳校官監察御史臣曹坦

中書臣劉源溥覆勘

總校官知縣臣楊懋珩

校對官中書臣田尹衡

謄錄監生臣何永濤

欽定四庫全書

小鳴稿卷三

明 秦王朱誠泳 撰

歌行

弘治龍飛歌

於皇太祖高皇帝受命于天馭神器巍巍六合永為家  
鴻業相承千萬世文祖神謀治兩京武戡文化天下平  
猗歟仁祖及宣祖洋洋雅頌同休聲英皇智勇冠前古

百萬貔貅振威武重登大寶日重明至治真成步三五  
綿綿歷數歸憲宗與天同運還同功虞舜執中傳聖嗣  
漢文至孝尊慈宮六龍返轡歸何急攀折龍髯追莫  
及紅塵隔斷白雲鄉羣臣空抱遺弓泣太平天子屬今  
皇堯眉舜目非尋常元老徵來居鼎鼐羣姦屏去投  
遐荒放珍禽驅猛獸祖訓昭回光復舊琅玕火齊卻承  
筐商璉夏瑚輕莫售天命維新政維始不宗佛子宗夫  
子前朝陵寢總霑恩萬國山川俱入祀風不鳴條海不

波四時玉燭調元和邈綿天統紀弘治宗臣首倡龍飛歌

長歌為宗伯汧陽端懿王作

猗歟我祖秦之康維嶽鍾秀通天潢嫡庶振振四男子  
一一教之以義方我考惠王襲祖蔭分茅諸父皆封王  
驚驚麒麟瑞明世中間傑出推汧陽玉葉金枝竟凋殞  
歸然僅見存靈光王性恬然靡所好孜孜為善希劉蒼  
宗藩耆壽典刑在如松斯茂蘭斯芳厭世一朝觀化去

騎箕遊彼白雲鄉遠近無人不嗟悼沉在骨肉情尤傷  
訃音千里達當宁便蕃卹典非尋常奉常稽行諡端懿  
帝曰休哉王可當象賢克孝有宗子三年血淚流淋浪  
咫尺終南瘞冠劍杜陵西畔曲江傍寒烟落日翳荒草  
瑟瑟悲風號白楊吁嗟王心料無憾含笑幽宮天地長

放情歌

我生大塊間俯仰無愧怍靈臺澹以虛祗知為善樂五  
音錯吾之耳目六材滑吾之口清蕪之雅趣在岩壑沉

乃至性嗜哦吟富貴非吾欲坦夷是素心有時宮居厭  
煩熱飄然直欲攀明月飛上蓮花第一峯更踏虹橋看  
銀闕有時鶴背御罡風扶搖直過蓬萊東回首滄溟一  
盃小側身為掛扶桑弓一笑歸來還擊缶自酌天漿斟  
北斗扣歌幾闕遊仙詞彩鳳和鳴赤虬吼憶初元是瑤  
臺仙紫皇謫我三千年青山為塵海為土永與日月同  
周旋

具慶堂歌送高廣原教授省親還江西

泰和為郡壯且雄鬱然佳氣常蔥蔥文山字水孕靈秀  
瑰奇人物生其中高家阿翁年七袞雙瞳點漆顏如童  
舉案齊眉人亦健身綏五福優閒同百年名閱詩兼禮  
先後衣冠應濟濟風流江左世無雙玉樹芝蘭滿堦砌  
箇中傑者乃廣原十年輔導居藩邸驅馳千里省庭闈  
賓筵暫輟劉交醴春風吹衣宮錦香里閭草木增輝光  
承歡膝下奉顏色具慶堂開稱壽觴羅綺叢叢咽絲竹  
壺天日月何其長古今萬世尊常道須信人生在忠孝



立身無愧顯雙親  
移赤還應為君報  
我觀具慶圖為作  
具慶歌願言齊壽  
考更比喬松多紫  
泥封誥來鑾坡天  
恩浩蕩沾餘波  
具慶堂高嵯峨芳  
名千載當不磨芳  
名千載當不磨

愛梅歌

羅浮仙子名姑射  
影落壺天澄玉質  
嚴霜滿地冱寒時  
萬木蕭條更無匹  
本來的生面同暗  
香浮動冰蟾中  
老幹虬蟠硬如鐵  
翠羽枝頭夜裊風  
我有愛梅癖夢寐

常見之朝來散步繞花下暮亦巡簷與鶴隨我愛梅花  
豈無意愛渠賸有調羹味歲寒心事願結盟共保堅貞  
莫輕棄

神駿歌

渥洼龍種世所稀一一標格矜權奇房精變化降下土  
飄逸肯受黃金羈良造一朝司控制歟然雷電霜蹄隨  
周王圖裏空馳驟韓幹筆端非所知當日臨淮曾破敵  
賊鋒辟易何能為聖皇攬馭清寰宇猛氣雄姿誰敢窺

恩深伏櫪亦知報萬里沙場力未疲駿兮駿兮安得復  
生一十二為我掃除邊警甦瘡痍

金魚歌

金魚來自金仙國三十六鱗誰與飾金仙親手傳金泥  
滿池都作黃金色自疑身自金仙來鑿池引水青天開  
等閒俯檻玩且詠相忘物我何悠哉黃金佛國真可誇  
金盆又出金蓮花呼童滿進金壘酒肯使金魚薦齒牙  
金魚金魚汝幸在吾治育子生孫足怡老莫愁咀嚼莫

愁烹恣爾優游戲萍藻

夢中仙遊歌

夜夢一羽人云是赤松子授我九還丹服之能不死又  
言攜爾遊太清共騎彩鳳摩青冥相逢子晉笑相揖為  
我殷勤吹玉笙天風泠泠振環珮蕊珠宮闕何崢嶸東  
望蓬萊西弱水倏忽周行數萬里却怪天雞唱曉頻恍  
惚驚回困窓底覺來自信還自疑多少迷人睡初起

新燕歌

一從秋社去春社與誰期年年來往如相識又向烏衣  
國裏歸王謝堂前音問絕玉京紅縷聲悲咽壘逼高樓  
柳似烟泥銜香徑花如雪一番相見一番新呢喃終日  
語頻頻雙飛莫入深閨裏人在綠窓初睡起

金臺王氣歌

我祖應天命車書混南北定鼎制多方當天履中極大  
都之地何雄哉真人御世自天來九重宮闕三台近萬  
里河山一詔開城高北斗星辰拱雨霽居庸青疊聳黃

旗紫蓋鬱咎堯彩鳳迴翔赤龍擁千官待漏五更寒兩  
柱擎天峙角端介冑如山趨侍輦爐烟繞陸侯迎鑒我  
朝元氣回前古靈物呈祥遍天宇騶虞已見出南河獅  
子重看貢西土當今天子思唐虞維持變理多通儒玉  
堂日日有歌頌青瑣年年無諫書一朵紅雲籠斧扆百  
花仗外飄然起玉容侍女接絲綸繡帽才官輝錦綺禁  
柳三眠絮欲飛退朝閒過御橋西覆鞍黃帕觀呈馬纏  
項紅羅看鬪雞香塵紫陌人如蟻車騎縱橫溢閭里暗

香遙引玉鞭來滿眼紅粧隔簾底王孫公子日相從笙  
歌無日不春風宋公自昔推清製魏國于今表大功六  
曹五府相連絡梵刹琳宮耀丹雘公侯列第武功坊耆  
儒應制文淵閣三十六宮鶯亂啼四十八衛馬爭嘶霜  
飛柏府烏千點春日梨園錦萬畦金臺王氣千年在青  
入西山終不改堯天蕩蕩景星明瑞日相輝助光彩阿  
誰談笑覓封侯莫負明時赴黑頭深愧維藩無寸補天  
高日望五雲樓

對月行

城市囂塵漲烟霧姮娥有約誰分付我家咫尺隔蕭牆  
弱水肯容舟楫渡夜靜深宮刻漏長沈沈天宇生微涼  
玉盤寂歷轉河漢琉璃萬頃騰清光幽興滿懷寧復寐  
姮娥此夜應無睡笑拈北斗酌天漿寒氣逼人渾似醉  
天香萬斛搖金風吳剛玉斧聲丁東銀橋貝闕在平地  
等閑呼吸騰青空我為嫦娥笑開口長生有藥曾知否  
願從白兔乞刀圭親向蟾宮拜登受桂花樹下共婆娑



青鸞騎出凌滄波木公錫我八千歲相看不老同山河  
五馬朝天行送嚴宗哲太守

五鼓紂如天欲曙宣傳五馬朝天去朱轡皂蓋引雙旌  
逸氣摩空更軒翥文章太守真奇才元驅五馬從天來  
霜蹄二十起雲霧遙遙復上黃金臺黃金臺高幾千尺  
鳳閣龍樓綯晴日臺邊五馬繫三花入覲天顏述臣職  
年來善政滿四方口碑載道聲洋洋賜金增秩荷殊寵  
永興山水皆輝光知君此去追前烈鼎鼎鹽梅待調燮

古來郡守作三公努力功名趁頭黑

素扇歌

我家近似篋簾谷不種薔薇種脩竹呼僮洗出化龍枝  
錯落金刀削寒玉宛轉瑤璫獻雪膚清風滿座來吾徒  
颯然置我湘簾底手持半月搖冰壺一開一闔真奇絕  
肯把雙瞳迷五色等閒欲倩右軍書却恐霜箋汚烟墨  
高情雅淡本相同此柄還君掌握中會當掃盡三庚熱  
笑騎白鳳凌丹空

七言古詩

登樓

百二金湯浮六幕憑虛如上蓬萊閣九州下視不盈眸  
何用盤游縱騶駟幸分茅土守西方景行東平為善樂  
金壘有酒謾如泉變理淺深隨意酌中人披我登雲梯  
長恐簷頭星斗落終南泰華獻奇峯萬朶芙蓉簇花萼  
有時金碧變雲霞似避吾詩愁律縛北辰拱捧望神京  
天柱高懸雲漠漠丹心飛繞紫宸居恨不當軒展葵藿

回頭有淚灑松楸  
雨露寒霜感邱壑  
龍蟠虎踞本天成  
馬鬣牛眠欣有託  
浩歌穹壤不勝情  
歌罷清風起寥廓  
坐聽珮響落珊珊  
恍惚仙人下黃鶴

早起對雪

天人翦水光玲瓏  
亂飄瑞葉驚酸風  
乾坤茫茫眩銀海  
萬里山河無路通  
水晶簾幕寒威重  
大地渾無一塵動  
南枝翠羽啼早春  
數聲喚醒梨雲夢  
曉來東閣呼僮奴  
淨掃冰花烹竹爐  
自憐學士有清趣  
不比豪家太尉粗

我皇聖德充寰宇太平象兆多如雨管取明秋大有年  
四海謳歌舜禹

九鸞圖為魏大用僉憲題

春樹垂陰春雨足  
湫澦銀塘漲新綠  
何處飛來屬玉羣  
相逐波間弄晴旭  
宿食飛鳴態度閒  
網羅不到清溪灣  
有時一行上天去  
鳳凰池上聯鴛鴦  
班畫工圖此寧無意  
得句紉思緣古義  
我師此義不師工  
目覩令人心惕勵  
偉哉僉憲古人徒  
愛此寧殊丹穴雛  
素心一點與俱白

虛室相忘餘此圖眼前何限丹青筆生色雖工總無益  
不觀南浦錦鴛鴦交頸雙雙徒爾匹

悼鶴

有客有客來青田貽我縞素之胎仙放之庭下自舒逸  
有時飛上蒼松巔落地蹁躚如寄傲風動霜翎舞還蹈  
數聲長唳徹青天踏破蒼苔猶未掃丹頂日深毛日蒼  
紛紜駕鶴敢同行幾番露下秋空冷樹杪戛戛聞悠揚  
昨來漫爾穿林去誤落遼東華表柱流丸何處忽飛來

毛羽離披嘆遭遇歸來病骨不可支浮邱老去誰能醫  
可憐一夜竟捐棄佐卿無復來庭墀惆悵九皋已陳迹  
安得回仙為裁笛漢江樓上月明時吹引天風裂山石

對萱花有感

誰向北堂培寸草四月花開生意好何事南風太不情  
等閑斷送成衰老人言咀嚼解忘憂我對此花雙淚流  
乾坤有限恨何極犬馬私情難與酬我思柔順萃吾親  
闕雖風化行西秦內治遠同周太姒敢云公子皆麒麟

七齡愧我尚蚩蚩機杼參丸勞母慈一朝奄忽棄我去  
驚車杳杳焉能追只今已嗣親藩爵玉食衮衣非所樂  
悲吟鎮日對茲萱忍見花開又花落花落明年又復開  
鸞車一去何當回滄溟可枯石可爛抱泣北堂能已哉  
哀詞難盡付長歌淚筆淋漓寫蓼莪吁嗟有國不逮養  
傷心其奈萱花何

秋江晚渡圖

寒江波冷西風急況是津頭日將夕長年引手費招呼



搔首攜囊空佇立乾坤擾擾嗟浮生烟波萬里爭微名  
如此風濤竟安適旁觀顛覆令人驚商人冒險如平地  
只說茶船千倍利湘流東下欲兼程魚腹埋魂真可畏  
獨有漁翁不為錢漁歌歎乃叩漁船得魚換酒醉明月  
一輪還繫江之邊憶昨龍眠為寫圖金壺墨汁何模糊  
高堂掛壁坐興嘆知者還應尋坦途

甲辰歲闕中大侵

闕中連歲天無雨涇渭揚塵水如乳時當四月景清和

却訝炎蒸乃如許太華終南無片雲草樹焦枯欲自焚  
流移老穉日如蟻啼饑遠近聲相聞面垢頭髻衣百結  
手足胼胝淚成血流離血屬各天涯多少僵屍委溝壑  
見此令人心孔傷鼎鐘那忍居高堂安得陳陳萬倉粟  
分炊盡使充饑腸露跣告天誰最苦誠悃無由達天府  
欲憑大手挽銀河沛作甘霖滿西土

丁巳雷雨大作

神龍倒捲滄溟水灑作人間及時雨終宵達旦勢傾盆

沃潤枯焦勝膏乳狂風號怒撼乾坤  
潑墨濃雲白晝昏  
四簷急溜瀉川峽平田頃刻驚濤奔  
未須借劍斬妖魃  
霹靂威聲震寥廓一時灾沴盡掃除  
滿路流移藉全活  
當今天子坐明堂宵旰圖治心皇皇  
一念精誠格蒼昊  
六合駢應來禎祥佐時更喜調元手  
方泰誰云值陽九  
芄芄禾黍屢豐年看取國書書大有

詠雪和歐陽公禁體韻

長空汗漫呈六萼脈脈隨風旋回薄  
望窮袤廣極幽潛

至巧信出天機作江山一洗塵土空使我方寸成恢廓  
即妨見現行且消輕體不受春陽爍閉門靜聽疑有異  
歷亂寒聲瓦溝落衾裯如水不成眠起坐中庭擁裘貉  
狡兔失穴不得歸饑鷹斂翮難施攫農倉有粟床有醢  
醉飽歌謳躍如雀出門玩賞恣所如水行孤舟陸雙屨  
一方坐食百無補矧敢暇逸先民樂題詩苦無道韞續  
取茗不待家姬淪紙牕官燭夜沈沈翠栢蒼松雲漠漠  
翻思吟社十年事白戰壇中曾擁掣短歌聊爾代風謠

不似尋常浪吟嘯

壽夏廷贊行人母八袞有三

春江雨過春波綠  
銀甕香生春酒熟  
肥魚鮮笋雜初筵  
一派笙歌沸華屋  
江南名郡說高郵  
清門積德如山邱  
有美來嬪餘八十  
翟冠霞帔心忘憂  
高堂坐擁紅氍毹  
掌上看成明月珠  
當年慈訓動人耳  
手和熊膽勞動渠  
鳳雛早上青雲程  
淋漓御墨親題名  
行人遠使傳天語  
四牡駉駉玉節榮  
一函賚賜來西土  
文采威儀快人覩

春風便道歸故鄉  
書錦優游輕負弩  
綵衣正及杏花天  
稱觴起舞庭堦前  
世間瀛島是仙宅  
阿母來降三千年

雨竹

鳳毛襴襪灑寒雨  
綠玉團雲飛不起  
窓涵翠滴潤圖書  
涼氣滿天秋若洗  
湘江曾夢泊孤舟  
一片瀟瀟落蓬底  
夜深驚起倚闌干  
却憶美人隔秋水

中秋無月

去年今夕秋雨晴  
銀蟾出海何晶明  
中庭宴集愜幽賞

良夜況與清風并水精簾開廣寒府十二瓊樓輝玉宇  
溥溥白露洗瑤空桂影婆娑素娥舞仰天舉酒吸寒芒  
萬頃金波流肺腑恍疑身世在蓬瀛漏下人間驚五鼓  
今年此夕何重陰濃烟黑霧天沈沈老桂無香素娥倦  
冰簾不捲瓊樓深庭院無人苔蘚濕蕭蕭樹杪秋聲急  
青燈兀坐轉無聊四壁陰蛩宛如泣陰晴變態真浮漚  
休信青春難白頭不見去年與今歲清光可得長淹留

臨池

我性元來喜幽獨長笑癡人避空谷臨流處處得天真  
不問外邊絲與肉一區有地東之偏甃池那用青銅錢  
池深怪我欲何事聊以貯此千斛泉華峰船藕誰能掘  
玉井千年亦空竭無緣高覓十大根隨騎等閒來百粵  
朱明守夏薰風涼花開正作黃金粧紅者惟紅白者白  
宮城十里飄清香金魚無數長過尺出水荷翻尾搖赤  
地底休誇錦作鋪古來浮浪皆陳迹石鯨風動昆明寒  
華清墮翠成闌珊何如此池開半畝直與君子長交歡



春曉

宮壺夜盡銅龍水萬戶千門曉鐘裏美人猶自擁羅衾  
剛被綠窓鶯喚起我時起坐園錦屏深宮詎敢忘晨興  
韶華明媚有如許況與豐年上瑞并園官走報春將老  
駭紫驚紅花正惱朱衣小隊隨肩輿亭沼悠然胸次好  
春風看遍名園花坐對芳尊戀物華鳳笙龍管百年醉  
但令顏色如丹砂

西園竹

渭川半畝西園竹遠比猗猗在淇澳和烟帶雨初移來  
一片鳴璫響清玉出林新長萬琅玕堦前日日報平安  
籜龍滿地礙行徑颼颼風動生清寒雅性從來無所好  
獨愛此君頻索笑呼童汲水煮新茶坐對吟詩更竒妙  
汝生氣味同吾人德音自是吾嘉賓虛心直節每相許  
歲晚為我添精神垂垂擬結千年實鳳鳥飛來還恣食  
等閒月下有人過乞與回仙製長笛露華如洗翠作叢  
鏗金擊石聲摩空出門如見此君在猶愧當年衛武公

讀李太白詩

天上酒星終日醉寒芒猶占長庚位敢入蟾宮竊侍兒  
酣迷不省身遭累一朝天帝怒且嗔自天謫降埋紅塵  
長安市上酒家卧晚視四海如無人蓮峰為筆天為紙  
天縱奇才厭餘子斗酒真成詩百篇秀似芙蓉出秋水  
醉來花下還一呷遮莫清光照華髮海吸鯨吞未放乾  
等閒字字皆英發有時踏翻鸚鵡洲有時撻碎黃鶴樓  
偏師突出敵崔顥肯讓區區先一頭可惜仙才竟棄捐

江頭弄月身翻然騎鯨萬里上天去精靈料得歸星躔  
文章流落在人世萬丈虹蜺燭天地何當烈火鍊黃金  
為鑄斯人示吾契

題山水卷

萬朵芙蓉插天碧疊嶂層巒森列戟雲外鳥啼松徑深  
渡頭水泮春流急落花飛絮踏成泥蘭茁紫芽蒲葉齊  
桃花依約天台路烟霞彷彿武陵溪物外神仙居海島  
瓊芝珠樹連瑤草樓閣參差入望迷眼前便覺人寰小

林良雙鳳鳴陽圖

嶺南畫師稱國手出入相門呼老友意態居然成一家  
風流奇絕前無偶朝陽赫赫來天東一輪湧出海霞紅  
羲和如駕復停馭高岡對峙鳴雌雄九苞瑞世仍華國  
靈囿千年寧復得文明有象入清朝指鳥何人敢狂惑  
畫師文采亦出塵阿閣清嚴為寫真眼前多少啁啾狀  
肯使凡毛易混珍庭院風清竹梧細隱約枝頭聲噉噉  
四座周迴展卷看此身如在蒼姬世

弘治辛亥夏久雨

萬里陰雲潤如席  
太空欲淨風無力  
老龍下捲河水乾  
咫尺終南渾莫識  
晝夜翻盆未肯休  
宮庭行潦成橫流  
千門萬戶虞覆壓  
顧我仍懷杞國憂  
秦川父老念禾麥  
坐視泥塗愁窘迫  
三邊賦稅積如山  
轉運動煩千萬石  
安得陽烏現海東  
照徹后土天之中  
照徹后土天之中  
遂令佳氣回年豐

假山

金天昨夜風雷起知是巨靈移礧礧擘破蓮花第一峯  
為吾安置庭除裏雲根聳立本天成蒼苔無數雨中生  
仇池不羨石為寶等閒相對怡心情有時吟詠消塵慮  
信步推敲忘去住竟日從容到上頭四顧悠然適佳趣  
綠窓朱戶厭深宮雕闌倦賞延州紅何如身在小蓬島  
飄飄兩袖乘天風剩欲開尊拚一醉不須遠召東山妓  
掀髯喚起謫仙人酒邊敲碎玉如意

綠陰清晝

金爐香燼日初永  
鼓吹聲聞厭蛙黽  
槐陰滿地翠且重  
水畔坐移簾底影  
飄飄天末輕風來  
涼生小殿勝蓬萊  
苑牆花霧尚紅濕  
來青樓下淨飛埃  
談邊霏雪能銷暑  
賓從憑誰供笑語  
練衣隔竹敲南薰  
一曲瀟湘帶烟雨  
揩頤尤愛誦南華  
逍遙物外奚紛譁  
小奴引綆汲深井  
為我細煮黃金芽  
朱闌繡戶遮筠箔  
翠袖紅裙恣譔謔  
擾擾浮生醉夢中  
白晝如年惜拋却

聽嵇美中彈琴



有客有客攜焦尾玉立庭堦儼容止  
袂囊為我拂金徽  
一瀉幽懷弄清徵游心太古契冰絃  
五音高下聲相宣  
調成起立命之坐焚香先鼓南薰篇  
初疑昵昵語兒女  
指下絲聲寫淒楚忽然放手如風生  
猛士戰場齊奮舉  
須臾一段在高山穿雲裂石誰能攀  
終南泰華幾千仞  
恍惚置我庭除間宮沈羽振復流水  
倒瀉銀河猶未已  
龍門九折出崑崙駭駛驚翻千萬里  
吾生雅澹厭紛紜  
趙瑟秦箏渾茂聞為君淨洗鍾生耳  
共隨白鶴巢松雲

子昂萬竿烟雨卷

風流學士宋公子玉堂揮灑金壺水渭川千畝貯胸中  
烟雨都歸筆鋒裏簫簫無數長琅玕彩鳳飛來玉宇寒  
籜龍蛻骨何太暮孤梢還拂雲之端隔世可人如對立  
淒迷濃墨看猶濕百年心事付南枝疑共湘靈夜中泣  
嗚呼此老神仙流七絕奚啻此君道茗溪山水亦何意  
令人獨說東陵侯

聞鶯

長安雨霽東風急滿目春光逾六十鴛鴦睡暖燕初來  
金衣公子正愁濕苑牆霧薄花欲然一聲啼出牆東偏  
美人樓上暫停繡歌喉宛轉相留連過耳好音真有限  
翻訝枝頭爭覲睨肩輿駐聽還低徊似向花前催酒琺  
欲憑鼓吹鳴詩腸青春白日何悠揚丁丁伐木起遐思  
出谷遷喬詠不忘

聞余士英都憲征西得捷時予國戚廖廷璽都聞  
在麾下得功尤多

年來小醜何陸梁蚩蚩敢爾窺邊疆我軍未出本持重  
堅壁清野歸牛羊塵沙捲地驚都護上請龍顏赫斯怒  
臨軒授鉞誰敢當視師乃有唐裴度公才況是眉山英  
鑿鑿胷中皆甲兵指麾一掃無遺穴四塞河湟金鼓鳴  
維時亦有廖都帥勇冠三軍氣尤邁揮刀上馬輕如飛  
叱咤一聲敵盡敗視師嚴毅都帥雄白日殺伐生天風  
鐃歌新奏凱旋曲萬馬驕嘶如蹴空文雄露布走雙騎  
捷報歡呼動天地邊人安枕樂耕桑酒熟蒲萄幾家醉

聖恩稠疊賞元功  
文資武級兼高崇  
凌烟閣上動光采  
會寫余公與廖公

送致政蔣用璋知縣還吳

長安陌上花正飛  
蘇臺遊客初辭歸  
一年南北慕丰采  
相見那忍仍相違  
關陝適逢天久旱  
山川草木無精輝  
灞陵行館盡蕭索  
滿道流移恒苦饑  
秦人半死委溝壑  
肝腦塗地豺狼肥  
送君此日空惆悵  
離筵把酒風吹衣  
嗟君夙昔多抱負  
眼見顛連忍含哺  
濟時長策滿胸中

袖手胡為乎中路江南景物吳門偏風月常隨詩酒船  
綸巾野服任蕭散飄飄儼若瀛洲仙憶君年少曾登第  
百里花封民感惠官輕便覺折腰難墨綬銅章遽捐弃  
流光慶澤鍾賢郎廣寒丹桂飄天香十載燈窓富文學  
飛黃指日當騰驤願言行義以達道登庸慎莫仍韜光

四時詞

四首

東君着意淨塵土無限春藏舊花塢風雷初動曲江頭  
鞭起蒼龍夜噴吐噴雲作雨結微陰紅綠扶春上遠林

秋千院落人如玉一刻直抵千黃金綠窓風暖語鸚鵡  
香氣薰人日亭午海棠睡足倚雕闌花罨遊絲簾外舞  
鳳笙龍管金叵羅烏衣能舞鶯能歌春光九十轉頭去  
有酒不飲如詩何

長安炎蒸無地著望望翠乾雲掃岳南來天上火龍飛  
誰敢衝烟犯頭角宮院沈沈白晝長槐陰滿地薔薇香  
水晶簾動侍兒入玉壺金碗供寒漿碧池荷葉圓如鏡  
為折荷花斷荷柄捲來薦酒藉清香滿泛流霞飛逸興

鬢髻露坐日養慵三庚憚暑難為容乘酣直欲袖明月  
飛上終南第一峯

金天涼冷金風急萬點金螢照宮掖銀床夜夜落梧桐  
宮樹朝來零露濕乘閑試上來青樓咫尺南山入遠眸  
闌干徙倚括竒觀詩成敲折珊瑚鈎東籬采采黃金蕊  
遠致南陽菊潭水安排服食制頽齡水味花香濺牙齒  
酒滿金壘秋月明可人別去不勝情短書欲寄何由達  
萬里長天一鴈聲



長安一夜酸風乳雪片朝來大如手紅爐乍煖鳳笙溫  
旋割羊羔薦春酒金天肅殺春到遲貂裘無奈冷相欺  
小奴走報啓扉入梅花方著東南枝雪霽懷人動清興  
剡溪灞上多奇勝呼舟策蹇兩相妨區區富貴謾千乘  
方閣護雲顏渥丹青綾紙帳薰沈檀人間清夜不成寐  
天上瓊樓幾許寒

長江萬里圖

江豚吹浪江風起地坼驚蛇綰江水日暮津頭愁殺人

極目烟波幾千里扁舟南下急張帆黃頭屏氣窺驚湍  
天吳戟手真可畏始信人間行路難寄聲射利千金子  
水馬乘危恐難恃一朝宛見蹶霜蹄恐使全軀飽鱸鮓  
憂讒更憶南遷客獨倚危檣心欲折故園京國路茫然  
黑首須臾變成白黃蘆兩岸棲漁翁釣絲輕颺隨西東  
得魚沽酒亦自喜不落人間風浪中坐閱此圖長太息  
蝸名蠅利竟何益爭似青山卧白雲瓦缶泉香漱終日  
四美人圖為永壽王東軒題

春宵苦短春晝長夢回殘月穿迴廊西樓曉晴花氣重  
東風吹入簾櫳香起傍雕闌久延佇霧煖只愁花睡去  
高燒銀燭繞花傍唱徹金雞海天曙

綠烟散盡天如洗露滴銀床塵不起寒水一片濕欲流  
冷浸碧空秋萬里倚闌相對不勝情翠袖飄風舞態輕  
香燼寶爐檀板歇桂花陰底夜三更

銀蟾夜落金盆冷玉手翻波弄晴景廣寒移入水晶宮  
掌上分明見清影深閨靜悄不成眠欲問嫦娥路渺然

秦樓人去彩鸞香  
冰光此夕因誰圓

惜春無計留春住  
手撚花枝繞花樹  
嫩紅深白總堪憐  
來往徘徊不能去  
歸來粧閣日未曛  
滿身花露噴餘芬  
笑舒玉指捲雙袂  
試問女奴聞不聞

秋夜即事

深宮夜靜金風冷  
滿地梧桐漏疎影  
月華漾漾露零零  
長嘆一聲聞鶴警  
我時無睡倚床屏  
百感中來萬事并  
披衣起步庭階下  
不覺技癢詩相縈  
金爐熱火焚龍腦

偶爾詩成問房老試聽吾詩汝解不玄酒元來淡方好  
銀燭高燒夜未央隔簾爽氣侵衣裳侍兒似解主人意  
得句便欲移新腔對景誰能負今夕佐興還須瀉雲液  
試教歌我秋夜篇一片商聲振金石

翫假山池亭

新碧鱗鱗漲沙渚一點紅塵飛不起好山四面畫屏開  
百斛青螺淨如洗徙倚闌干日正長濯纓何必臨滄浪  
假山雖假有真趣雲影倒蘸涵天光

懷馬天祿少卿

可人昔自長安別，別後音書成斷絕。  
五雲宮闕鬱岩嵒，幾度瞻天仰卿月。  
憶君承詔似登仙，雙旌北上何翩翩。  
左右執法賴平允，釋之定國真齊肩。  
曾侍玉皇香案側，十載彈文飛白雪。  
暫令仙鶴下人間，獨立霜毛誇峻潔。  
魁選人稱倚馬才，至今價重黃金臺。  
詩成四韻只三步，敏捷何煩擊鉢催。  
外臺最好能持節，精鑒時髦類澄澈。  
陳陳詩案積如山，到處淋漓有題墨。  
自君之去幾經春。

索君深愧秦無人淒涼空賦懷賢詠渴心日日生埃塵  
朝來有使金臺去草草檄題寄長句停雲千里倚闌干  
滿地清風起庭樹

送道士還山

山人只在中山中醉醉愛白雲深處睡偶然賣藥入城闔  
手抱瑤琴見清致猗蘭古調竟何之當軒為我鳴朱絲  
曲終狂笑天地窄三斗自吸寧能辭虛名拋擲如敝屣  
只說終南多石髓一七入口甘如飴辟穀于今若干紀

金匱要略卷三  
卷三  
拂袖攜囊歸舊巢天風滿路輕飄飄凌空一躍仙人杖  
拄倒來時舊鐵橋

夢萱為新齋兄賦

當年堂北萱花開慈親正少兒提孩今日慈親竟何逝  
忽驚風雨萱花摧誰道吾家風景好慈闈寂寞萱花老  
罔極常思鞠我恩未應喚作忘憂草長夜沈沈宮漏遲  
氤氳寶篆銷金猊神遊天上隔風雨今夕分明夢見之  
醒來感嘆情何極舉目茫茫淚霑臆傷心不忍覩茲花



塵滿北堂空佇立徘徊我亦繞花傍仙源一脈同天黃  
七齡慈母早見背此恨相為天地長

女仙圖

碧桃花外飛青鳥金母麟車踏瑤草御書有約會麻姑  
弱流遙望蓬萊島天風颯颯吹霓裳九霄環珮聲琅琅  
雙成手把玉如意車前作伴呼阿香塵埃難染圭璋質  
名姓生來入仙籍雲窓霧閣隔人寰陌上少年空自惜  
燕罷瑤池拾翠翹玉簫聲斷彩雲飄陽臺總是荒唐夢

金屋何須貯阿嬌

春江捕魚圖

昨夜雷霆難掩耳朝來江上添新水  
萬魚喁喁發詎知名粗識鰈鱮與鯉  
鱣勝舟大更長箇中滋味推鱸魴  
河豚珍重西施乳入喉但恐生鋒鋌  
往來盡愛江魚美扁舟出沒波濤裏  
腥風起處動馮夷一網千頭貴知止  
江花照眼江水肥鼓枻江頭及早歸  
水底蛟龍能覆施相看多少蹈危機

寄暹日華上人

浮屠幾許棲京師白足登壇惟阿師落紙爭求懷素字  
逢人多誦貫休詩大顛曾致昌黎老參寥更與坡翁好  
文章蔬筍氣全無論到阿師每傾倒早年投禮大醫王  
活人功效非尋常調和不假萬金術湔洗惟憑三昧湯  
向來為我飛金錫甘露分嘗蠲宿疾野鶴閑雲恣所如  
飄然何處尋蹤跡金色界中曾結緣于今烈火生紅蓮  
能來更為住三宿慈海期登般若船帶礪河山逢聖代

已證金剛真不壞因緣早現國王身有髮何妨持五戒  
琴書自樂

我家肇造自皇祖我祖分茅守西土嗣予理國日兢兢  
寧敢流連縱歌舞寧王吹笛岐王醉肉盤多少申王妓  
獵車十乘走南山浪說齊王多快意前鑒斯人皆覆車  
吾之二友惟琴書五弦遠慕有虞聖六籍學為孔子徒  
琴滿錦囊書滿庫游心太始何真素百年三萬六千日  
日日追陪送烏兔

哀妻克讓方伯

憶昨西臺持憲節金玉當筵識顏色每同苑園賞春花  
更與池亭醉秋月憐君文雅復能詩等閑出口皆奇辭  
清音不啻振金石妙思真如抽繭絲一從作牧西川去  
食少事煩勞百慮漏天濕暗芙蓉城晴雪光搖紫薇署  
去年聽說監文場六經入手生寒芒精神生耗真可惜  
冰魂雪魄成茫茫赤虬天上來符吏知是虛皇徵作記  
空堂永夜冷淒淒寂寞誰承身後事蘭臺柱史重歎欬

為作祠堂在棘闌我亦臨風歌楚些還思化鶴一來歸

題脊令圖

黃蘆瑟瑟吳江冷烟月空濛濕秋景脊令對對在原頭  
來往飛鳴翻瘦影何人寫此意應殊生色初疑造化俱  
世情徒解譽名筆我獨臨風悲友于憶昔同胞將七弟  
鍾愛先王分一氣鳳雛龍種竟難成芳草斜陽盡捐棄  
黃金色相玉精神暫緣謫限留風塵不是吾家客茅土  
多應霄漢回星辰謏薄嗟余嗣重位國璽相傳恒恐墜

披圖憶弟更思親獨立乾坤洒清淚

陳所翁雙龍卷

雲滿虛空雷電激風猛波翻江海立雙龍奮出同蜿蜒  
頭角崢嶸烟霧濕所翁疑是人中龍滄溟曾與龍相逢  
等閑落筆寫神異分明首尾成雌雄斯翁久矣騎龍去  
遺墨千金嘆神遇高堂展玩忽生寒六月令人毛髮豎  
怪哉此卷須珍藏通靈變化非尋常床頭深夜動風雨  
祗恐破壁傾淋浪

壽伯汧陽王六十

乾坤萬里來春風天開壽域天昭融天人降誕乃今日  
葱葱瑞氣騰蒼穹吾藩尊行惟吾伯錫爵汧陽綿世澤  
忠孝賢聲徹帝聰文章令譽光先德羣仙入賀啟華筵  
龍管鸞笙聲沸天宗室兒孫今萬億遐齡同祝三千年  
維王樂善慕東平遥遥相望真齊名却笑劉安困金石  
時人浪說終飛升吾愛吾王何所祝努力加餐休辟穀  
長生不老對南山日日平安膺五福



題鳳翔趙太守紅梅圖

鳳翔太守非凡夫見我手執紅梅圖猩紅萬點照人眼  
恍疑擊碎新珊瑚乾坤佳麗江南好染出一枝春信早  
北人未識誤呼名梅格憑誰詰詩老我園亦自有紅梅  
移根元自江南來萬花頭上占春色粗桃俗李徒嫌猜  
太守長才足經濟郡齋坐對收清氣何當攜取真鹽梅  
為我天家調鼎味

端陽日池亭對雨

何事秦人憐楚節家家蒲酒相怡悅苦居嗟我久忘情  
停誦蓼莪罷朝謁肩輿暫出生池亭悠然喜見南山青  
忽驚頭上黑雲起四簷飛瀑聲泠泠却憶吳儂當此日  
競渡龍舟逞飛疾錦標奪得氣凌人不管沈骸墜蛟室  
從來楚俗恤無辜千古猶憐屈大夫角黍綵絲傳故事  
三閭精爽今存無為話前賢揮玉塵汨羅江遠傷遭遇  
離騷讀罷鑒前王謾聽淋漓池上雨

和蘇長公聚星堂禁體雪詩韻

簌簌窓前蠶食葉知是尖風又吹雪烟消楮地爐寒  
兀坐書空正愁絕後園脩竹委長身戛戛聲中都壓折  
幽禽凍殺不知數猛虎深林蹤跡滅海底靈鰲亦伏藏  
縱有長竿孰能掣凍芽滿地未穿土安得盈筐供采顯  
呼舟策蹇亦何事來往搜竒徒屑屑人生有酒但宜醉  
回首光陰真一瞥仰面嗚嗚雙耳熱功名富貴吾何說  
只恐詩成不著題鑄錯難聚九州鐵

題姮娥歸月畫

嫦娥飛入清虛府，貝闕珠宮隔塵土。  
萬古青銅竟不磨，謾勞八萬三千戶。  
有時自抱玉兔歸，露華沁濕春雲衣。  
天上高寒誰與侶，桂影婆娑香霧霏。

挽李都閫

火星墜營天，欲泣萬木冰。  
生夜僵立旌旗影，淡塞雲黃笳鼓聲。  
沈朔風黑轅門虎，將真丈夫雄姿赳赳何魁梧。  
半生豪放縱所適，意氣落落吞江湖。  
一劍沙場奮威武，誓欲將身報明主。  
馬革裹屍志莫酬，嗟乎無乃天之數。

忠魂自昔飛上天回首人間二十年流水落花空寂寂  
斜陽芳草自芊芊將門有將三軍帥能讀父書六韜在  
相機制勝無拙謀拜將封侯應可待天恩曠蕩責泉局  
山川草木皆光榮平生心事料無憾英風凜凜還如生

秋閨

銅龍漏咽良宵永風透玉樓羅袂冷倚遍闌干思悄然  
雲鬟斜亸誰為整幾箇梅酸蹙黛蛾閑愁默默當如何  
舉頭碧落星河淡露下空庭金氣多歸來香燼銀缸滅

半窓涼影梧桐月

紅梅

美人宴罷羅浮月一片春雲錦屏熱困倚東風逞醉粧  
水晶宮裏飛香雪宿醒滿頰朝未消脫却素衣披絳綃  
歲寒自許心如鐵俗李粗桃徒爾嬌

沈啟南寫山水花禽四幅見寄以詩答之

石田居士東吳叟人品清高稱妙手詩中兼畫畫兼詩  
酒後放歌歌放酒平生怕入利名場胸中萬頃涵滄浪

興來濡筆寫天趣坐令萬象無精光  
信手畫山還畫水  
幻出山僧與仙子珍禽異草入烏絲  
怪石蒼松落書几  
昨朝有使東吳來囊封千里輕瓊瑰  
高堂展玩那忍棄  
不覺令人心眼開君才詩畫真三絕  
肯讓前朝趙松雪  
乾坤遊戲了餘生海內何人呼俊傑  
一緘簡札遥相聞  
却恨關山隔暮雲記取藍田餐玉法  
殷勤傳去一酬君  
喜西安嚴太守禱雨有感

火雲銜日燒天地萬井炎蒸騰火氣  
終南泰華翠欲乾

水底乖龍正昏睡大造茫茫不可呼天符何事封江湖  
岳神不敢作雲雨三川二麥垂焦枯神明太守共天職  
廉平允合神明德朝祈暮禱曲江池馬上去來無倦色  
南山縛虎斫其頭黃冠持篆沈中流綠章飛奏憑肝膽  
天門夜啟風颼颼帝命金童追雨部頃見雲師布天宇  
雷聲震起五方龍三日淋漓瀉膏乳二麥從今慶有秋  
更期百谷盈西疇官家在在足倉廩烝黎處處興歌謳  
旱魃潛回災沴息多君獨有回天力秦人若解紀聲詩



穹碑定伐南山石

後園寫景

城中寸金營寸土我愛斯園帶花塢依稀風景小蓬萊  
始信神仙有官府錢刀不惜走天涯殷勤遠致江南花  
沿堦異草多蔥蒨參天老木何槎牙誰移泰華終南石  
巧作山峯疊青壁山下池中幾種蓮赤白紅黃更青碧  
金鯉銀魴玳瑁魚往來自適恒如如一點塵埃飛不到  
水晶宮殿涵清虛花時最愛花王好魏紫姚黃開更早

玉盤斜瑩壽安紅，却為迷離被花惱。兩行槐幄夾高柳，  
時送清風到。牕牖綠陰啼鳥，共幽人夾氣，自能消宿酒。  
黃花采采，開深秋滿林，紅葉霜初收。幾度醉遊明月夜，  
天香萬斛，霑輕裘。山頭一夜風吹雪，萬木蕭條寒栗烈。  
索笑閑尋綠萼梅，三種還分燭。紅白松栢蒼蒼檜，竹青  
相看同結歲寒盟。滿前好景道不得，四時詩興還相縈。  
柏臺豸史薇垣老吳語詩翁共襟抱，能吟賓從亦相從。  
好謎奇猜多絕倒，優游幸際太平時，有園有酒寧無詩。

但願花開詩侶健年年共醉黃金卮

和楊應寧僉憲詠雪韻

塵世茫茫昏又曉眼底何人能了了聞君玉節駐分司  
試卷委填知幾抱是時天女翦冰花粧點人間何太巧  
對此猶疑萬玉妃綴鳳裁鸞競相効豐年有兆笑聲多  
無那貧兒却成惱蕭條門巷斷人行風沙擾地憑誰掃  
江山霽栗如摧枯一夜長梢都壓倒乾坤幻作水晶宮  
玉峯萬仞成纖眇侵凌亦有堂前萱不及梅花顏色好

海雲滾浪還促空倒撒珠璣落天表驛途來往亦良苦  
驅馳不異藍闕道推敲馬上有新詩象外神遊勞腹稿  
形容變態步今古大筆端能補天造周詩曾詠屢豐年  
誰識豐年為國寶百穀於人皆有功豈若來牟最收早  
我願東西南北人鼓腹熙熙各溫飽老翁擊壤不知寒  
倚醉歡呼臂先掉行臺題詠極清新眼底如君應最少  
長歌和竟起清風坐擁冰壺天杳杳

勤有齋

六經充棟填華屋，挿架更餘三萬軸。黃金散盡寶奩空，  
猶自逢人叩書目。汧陽老伯吾藩尊，積書遠欲貽兒孫。  
自恐疎慵陷驕惰，手持黃卷窮朝昏。鷄鳴起坐更終日，  
隱几吾伊忘飲食。小齋簾捲麝煤銷，不管青衣花外立。  
夜歸蠟炬射金蓮，猶對朝來未盡編。窮搜苦索肯辭倦，  
翻笑當年邊孝先。無限好書皆爛熟，磊落爭誇載其腹。  
有時延訪出朱扉，應有諸儒羨書簾。萬卷開殘不可當，  
直從今日盡羲皇。揮毫頓覺鬼神泣，嘻笑怒罵皆文章。

始信詩書勤乃有子建安能專八斗有斐無慙淇澳詩  
珍重吾藩有耆耆

恕齋

二氣於人均稟賦聖賢亦自由人做我家老伯紹前脩  
識得如心之謂恕當年子貢請終身仲尼教戒何諄諄  
一言說破用無盡已所不欲無施人小齋斗大聊容膝  
華扁相看警朝夕物情世態任紛拏以理消除真有益  
阿翁心地自曠然何須問道更叅禪有德元來食陽報

定知遐算垂千年

宮人戲嬰

宮漏遲遲清晝長  
落花乳燕春茫茫  
君王放蝶恣遊幸  
三千粉黛爭輝光  
何物佳人獨霑寵  
流蘇帳煖生龍種  
眉目分明畫不如  
一顆明珠掌中捧  
侍兒穩抱近華清  
笑啼時作呱呱聲  
奮身似欲就其母  
招呼解識宮娥名  
內家墮地皆宗子  
分得天潢一泓水  
大者為王小者侯  
繼繼繩繩永無已  
却笑三郎懶作家  
恣渠野鹿銜宮花

錦裯兒嬌玉環醉金錢賜予何其奢良工畫此非無意  
用戒宮闈禁兒戲古來惟數太任賢胎教文王傳萬世  
攜琴訪友畫

危峯削玉插晴空淋漓秀氣含鴻濛兩間萬物有時易  
惟有青山今古同隱君山下營茅屋烟霞笑傲逃塵俗  
日長心境鶴俱閑自掃白雲松下宿溪頭野老行遲遲  
杖屨攜琴過竹籬猗蘭調古少人聽等閑來此尋鍾期

芭蕉



朱絃弄罷南薰起雨過空庭淨於洗太湖石畔綠叢叢  
新葉亂抽青鳳尾隔戶還疑擁碧幢更宜石下水淙淙  
美人翻惡濕陰重日午停針圍綉窓我時散步來還去  
為愛清奇閑倚柱吟成却憶橫渠翁新德新知引新趣  
刺欲題詩留醉墨只恐西風凋翠葉何當寫入無聲詩  
永向吾齋助奇絕

葵榴

南風催送東風去錦繡離披萬花樹眼前富貴竟成塵

喜有葵榴供逸趣我愛丹心向太陽肯隨桃李爭芬芳  
更喜朱英噴真火累累成實包天漿飛蠅不到宮庭肅  
隱几相看樂幽獨窓前一雨洗深紅更露本來真面目  
藩維事簡守真一鼓罷虞琴玩湘帙興來詠物適閒情  
一笑優游且消日

小鳴稿卷三

欽定四庫全書

集部

小鳴稿卷四

詳校官監察御史臣曹坦

中書臣劉源溥覆勘

總校官知縣臣楊懋珩

校對官中書臣田尹衡

謄錄監生臣何永溱

欽定四庫全書

小鳴稿卷四

明 秦王朱誠泳 撰

五言律詩

雨中漫興

八首

空庭人寂寂深院雨濛濛博具棊無敵愁城酒有功苔  
痕沿砌綠花葉墮林紅閉戶真為樂交情異孔融

一室惟容膝閒吟散鬱煩宮雲濃潑墨窓雨急翻盆地

僻人來少心清道自尊真宜守淵默世事不須論

歲月如流水新年異舊年閒眠非病酒癡坐類癰禪乳  
燕雙翻雨饑鳶獨戾天自知心有主肯被俗情牽

風雨連朝惡餘寒尚襲衣鶯花經目老車馬及門稀自  
喜一心靜休論萬事非任渠羣燕雀終日傍簷飛

腐迂甘守約澹泊詎云慳謀巧翻成拙才疎只類頑肯  
因身外事變却鏡中顏日日鈎簾坐悠然對晚山

地僻塵囂少齋居坐晏如清風回枕簟細雨潤琴書野

竹當窓密山雲入座虛自緣非吏隱能與世情疎  
對景多清興悠然得趣時閒臨懷素帖細詠少陵詩往  
事皆天定前賢不我欺達人斯契合處世復奚疑  
俯仰渾無累迂疎百不能未忘君子操肯畏俗夫憎古  
調輕齊瑟新詩付剡藤蕭然無物我興味似山僧

晚眺

雲散雨初收乘閒獨倚樓嵐深青可染樹重翠將流斜  
日林間下輕烟象外浮巖城將試鑰點點亂鴉稠

春日喜晴

長空開霽色，腐草亦生輝。  
列岫螺千斛，羣花錦萬機。  
林深山鳥弄，天濶野雲飛。  
莫負尋芳約，韶華過眼稀。

丙午元夕遇雪

今夕爲元夕，玄冥苦作威。  
襲衣風獵獵，撲面雪霏霏。  
里巷笙歌歇，樓臺燈火稀。  
定知豐稔兆，寧嘆賞心違。

寄戴松崖憲副

南北路漫漫，長嗟會面難。  
碧桃開復謝，黃菊看將殘。  
露

冷蛩聲切天空鴈影寒夜深惟有夢飛度越江干

秋聲

涼颼起天末萬籟發商音候鴈霜前度寒蛩月下吟  
小樓吹短笛何處搗殘砧滿耳秋聲入離人思不禁

殘月

嫦娥倦梳掠銷瘦不如前鏡面半收匣弓眉初下弦影  
隨更漏盡光並曉星懸不用頻嗟感盈虧理自然

即景



一雨消殘暑金風起樹端草根蛩唧唧天末露溼溼地  
僻人偏逸心清夢亦安吟成無箇事對景獨凭闌

冬風

蜚廉從北帝入丑恣威權細舞霜回瓦高飛雪滿天聲  
寒催鐵騎勢促脫羈鷗搖落羣芳盡松篁獨挺然

十四夜月

二七中秋近金波湛碧天似慳來夕滿却比昨宵圓白  
璧旋應合青銅覩少偏嫦娥藏貝闕粧束未能全

十六夜月

兔魄過三五光同昨夜清  
嫦娥非有意塵世自無情  
莫訝一分減何傷千里明  
達人窮物理應解戒持盈

春曉

萬井一聲雞晨光漸不迷  
林梢金鏡暗樓外玉繩低  
露重花偏濕風和鳥緩啼  
惜春人起早香霧散輪蹄

松風

靈籟生何處巢笙更越琴  
穿林驚鶴夢入澗和龍吟  
萬

頃濤翻翠千巖粉墮金坐來疑漱石真可滌塵襟

對雨

澠黷渾無罅淋漓不漸停平添深澗綠淨洗遠山青足  
慰農夫望休令旅客聽林鳩啼未歇花妥正冥冥

悲秋

草木皆搖落清霜襲綺裘蛩聲和露泣月影帶江流暗  
改潘安鬢明添宋玉愁乾坤真逆旅極目一登樓

九日席上次戴松崖先生韻

九日斯文會登高醉菊花酒拚三斗盡帽插一枝斜禮  
秩矜疎放盤盂愧靜嘉華箋寫新句香染墨如鴉

齋居雜興

四首

地幽忘盥櫛心遠覺逍遙喜共高人話寧從俗士招雨  
晴花氣濕風細鳥聲嬌最愛春泉活時分灌藥苗

深居謝塵鞅蕭散興何長簾捲薰風細窓涵夜月涼清  
談揮麈尾高卧據繩床車馬長安客浮生為底忙

一面新開霽悠然野趣真露懸蛛網濕花落燕泥新皓

月能隨我清風最可人好懷無處著覓句肯辭頻  
萬事皆由命行藏信所之推窓閒看竹把卷細敲詩事  
少晨興懶吟多夜卧遲拊心江漢遠無補聖明時

張太妃輓詞 二首

阿母乘鸞去瑤池宴不歸杜鵑啼有血嫠女淡無輝漢  
漠梨雲冷凜凜薤露稀生平多少恨萬事與心違  
早歲膺封冊嫠居五十年鏡中鸞獨舞天外月空圓清  
苦共姜節幽閒大似賢白楊風起處原草共淒然

甲辰元夕同戴松崖吳元素鄭子初湯侯菴諸先  
生燕集時在鎮安邸

長安初霽雪元夕值豐年盛聚文章士弘開翰墨筵星  
橋通貝府火樹燭瑤天莫惜今宵醉流光等逝川

甲辰元夕

今夕復何夕蟾光喜未陰笙歌嫌漏促燈火覺更深人  
事如朝暮年華自古今細翻新樂府轉調入沈吟

秋日即事

水淨鷺拳沙天空鷺帶霞數聲樓外鴈幾點樹頭鴉露  
冷楓飄葉霜輕菊吐花獨憐闌外戍鄉思動胡笳

題永壽王壽萱手卷

誰把宜男草移來種北堂露滋鵲嘴潤風裊鳳翎長子  
愛顏偏好毋看憂自忘壽筵開此日香溢紫霞觴

竹亭偶成

自笑耽幽僻能忘對此君綠雲環冉冉蒼雪落紛紛晚  
節經霜見秋聲入夜聞渭川湘水趣未許俗人分

瑞香次韻

異種產南方移來道路長牡丹空國色桂子自天香雅  
有清癯意濃無滑膩粧歲寒憐爾在高出壓羣芳

有懷王尚文少叅

目斷江東路懷人獨倚樓蟬鳴黃葉晚鴈度碧雲秋詩  
酒添新況園池感舊遊何時復相見談笑更綢繆

閒居漫興

二首

藩邸多清暇閒居愛日長疎簾晴靄散小殿午風涼疊



石詩中畫分泉靜裏忙伊人有高致寧惜共倘佯  
古鼎裊餘薰空庭絕點塵花香風外細樹色雨中新淪  
茗延醒客裁詩寄遠人最便閒樂處吾欲養吾真

次韻訪道不遇

春林通一逕野色此中分鶴跡松陰見泉聲竹裏聞草  
青經宿雨山紫帶斜曛採藥知何處柴門掩白雲

夏多雨

時光臨季夏終日苦滂沱曲逕深蒼蘚方塘漲碧波炎

威侵幌少寒氣襲人多為問調元手陰陽理若何

題公子遊春卷

玉勒鞚青驄尋春上苑東綺羅明曉日絃管沸春風楊柳搖杯綠桃花夾座紅鳥驚金彈落歸路夕陽中

夜坐有懷鄭司寇時良 二首

青燈孤坐久百感雨中生駐目關山隔驚心歲月更寒蛩鳴四壁征鴈度重城歌罷停雲句寥寥夢不成

湖海論心少惟君最我知幾年成曠別千里動遐思細

雨燈殘夜寒風葉落時天涯雲樹隔會晤杳難期

酒家

香筍聞十里人指畫橋東紫甕盛秋露青帘颭曉風麴  
塵飛柳外檀板響樓中社鼓楓林急村村卧醉翁

漁家

烟波為活計結屋近滄浪地接黃蘆岸村開綠柳庄輕  
蓑衝細雨小艇繫斜陽斫鱸茅簷下呼兒煮酒嘗

元夕次韻

蟾窟當空滿鰲山動地來六街香霧合萬井戶扃開烟  
火藏機弄燈詞作謎猜紅粧人結伴杳杳下樓臺

苦寒

萬象冰壺裏同雲滿太空閉門三日雪刮面五更風羸  
馬卧僵殍凍鴟蹲老翁鐵衣猶塞外忍對地爐紅

水閣

數椽依曲沼高興寓滄浪鷗鷺隨波戲菰蒲近岸香開  
窓山雨潤入生水風涼應笑長洲苑塵迷響屧廊

烟

似霧紛還郁如塵散復迷斜陽芳草渡細雨綠莎堤入  
塢籠花放沿山瘴鳥啼何時天祿閣照坐出青藜

遊山

綠崖入翠微嵐氣濕羅衣澗水浮花出松雲伴鶴飛行  
歌樵互答醉卧客忘歸安得依書屋開窓碧四圍

華山

百里盤根遠孤高倚太空雲開仙掌日鳥度石蓮風磅

礪舍元氣薰蒸妙化功終南與太白未許並爭雄

春雪

入牕宜三白春風底用賒漫空欺柳絮著樹失梨花頃  
刻成行潦微茫沒淺沙眼前應有象人事盡浮華

晴望

濃雲歸遠岫霽色滿層空烟抹樓臺碧霞蒸草樹紅終  
南隨鷗沒直北隱鴻蒙坐久疎簾靜涼生綠樹風

先天觀

路入無塵境琳宮日月長紫芝生白石綠竹蔭丹房曉  
日鸞聲噉秋風鶴夢涼先天叅透處斟水醺虛皇

故宮

前代豪華地烟塵一夢空驚歸宮樹老鹿去苑花紅輦  
路埋秋蘚歌樓散曉風御溝猶漲膩流出恨無窮

雲

膚寸起遙岑晴空忽作陰卷舒空有態聚散本無心伴  
鶴閒棲樹從龍慣作霖蓬萊常五色應護斗間深

溪居

南市津相近柴門日繫船曉峰明似畫春水遠如天鷺  
鴨應常數鳬鷺祇自憐夜來風雨惡龍過屋山顛

夏夜

赤日當空下輕飈送晚涼鬢髻便露坐沈瀝足天漿扇  
撲流螢亂簾浮睡鴨香炎燂尚煩鬱苦樂未能忘

盆池

鑿破庭前地光含鑑影多雨餘添小漲風急動微波冷



浸一拳石平鋪數點荷兒嬉同泖曲吾亦放吾歌

花影

重重還疊疊萬卉任榮枯日月照來有亭臺陰處無丹  
青誰着筆水墨自成圖只恐風撩亂殘花委地鋪

過山家

巖壑結芳鄰衡茅遠俗紛林深遲見日石亂自生雲樹  
影當窓翳泉聲入座聞幽居同木石鹿豕更成羣

過田家

結廬依畎畝耕作足生涯門巷閒眠犢池塘亂叫蛙園  
收新芋栗墻陰舊桑麻歲晚村翁會比鄰酒任賒

竹風

拂拂起林梢扶疎影動搖湘娥鳴玉佩秦女弄瓊簫錦  
籜飄香粉青鸞舞翠翹王猷當此際塵慮定應消

綠筠軒

一區幽寂地寒綠萬竿餘秀色當窓見涼陰入座虛風  
簾聲簌簌雨榻夢蘧蘧比管還吹鳳翩翩上玉除

擬早起

一枕夢魂清披衣出戶庭樓頭低兔魄屋角亂雞聲入  
市人稀到開關戍未行東方看漸白隱隱海霞明

惜花

一年春正好莫放小車空繡幄籠晴日雕闌怯曉風未  
能辭眼底可忍污泥中百匝千回看巡簷駭落紅

春晴

長空新雨過正及艷陽時淡淡東風軟融融麗日遲迷

漫飛落絮搖曳墮遊絲紫陌尋芳遍鶯花處處宜

假山

鑿破終南骨移來置廣庭巉巖從地立峭拔類天成秀  
色凌蒼靄晴嵐濕翠屏道人幽興遠相對每忘情

秋雨

西風吹浙瀝簷溜響浪浪廢沼添寒綠疎林落萋黃天  
邊迷去鴈堦下亂啼螫滴碎羈人夢音書滯一鄉

經橫渠鎮廢寺

瞻彼空王宅依稀舊跡存  
雨餘苔滿壁風攪葉堆門  
石鼎香烟斷崖碑字刻昏  
異僧回月下掃石憶精魂

題薦福寺塔

浮圖逾百尺突兀倚層空  
人語半天上鳥飛平地中  
寶輪朝炫日金鐸夜鳴風  
極目乾坤遠川流盡向東

道傍廢宅

衡門終日掩不見主人歸  
春到花空放年深草自肥  
頽垣多鼠穴古砌上苔衣  
獨有梁間燕雙雙似舊飛

秋風

蘋末蕭蕭起編茅尚幾家井寒梧葉墮圃老菊香賒堦  
下蛩聲切天邊鴈影斜曉來青鏡裏吹鬢落霜花

賞春

春光明遠近紅紫正芳妍野外張帷幄風前沸管絃綺  
羅人拾翠騷褭客停羈落日城南路香塵障暝烟

題山寺亭壁

面面峯巒秀開牕景絕幽嵐光簷外滴花氣座間浮野

鶴依雲宿山泉帶雨流禪心忘世慮終日自悠悠

延春亭

遶簷皆竹木春事此中多啼鳥將絃管繁花簇綺羅蝶  
穿紅錦幃人在翠雲窩若箇長延得何煩載酒過

宿山寺

勝遊心未竟日暮泊禪房月轉回廊白風清法界香問  
僧嫌偈短聽漏厭更長樹杪天雞舞鐘聲起上方

春寒

濃雲朝結暝倏忽蔽層空點點廉纖雨  
番番料峭風柳眉顰嫩綠花臉黯輕紅  
無限融和趣都歸冷淡中

早行

肅肅倦宵征晨興促驛程軟風隨去馬  
殘月照行旌野店雞三唱譙樓漏五更  
車徒經數里河漢尚縱橫

白牡丹

洗却紅粧面天然粉態真花王水作骨  
姑射水為神綺袂迎風暖瓊盃捧露新  
東皇嫌冶麗別幻一般春



春日久陰

二月春如海長空未放晴  
林花羞褪色山鳥噤無聲  
薄霧寒籠樹濃雲重壓城  
尋芳空有約風景太無情

月蝕

萬里冰輪滿陰氛幕地加青  
銅微有暈白玉漸生瑕  
望漢羣心竦量天幾秒遮  
憑誰操白刃為我斬妖蟇

風

囊口徐徐起號呼萬竅通  
秋林添病綠春苑墮驚紅  
吹

雨荒陂外翻濤大海中杜陵茅屋破飄轉襲西東

溫泉

坎德乘陰火靈源一氣真玉壺冰瑩潔巖竇雪嶙峋  
汨渾非潦溶溶暖似春衣成單袷製來學浴沂人

即事

軒扉開白日槐柳陰清渠堦下千竿竹床頭萬卷書  
草香薰蛺蝶水暖養芙蓉對景情無限清吟興有餘

中秋

今夕為何夕平分一半秋月明梧影亂風細桂香浮碧  
落茫無際銀河爛不收憑誰招庾亮攜酒共登樓

閒居即事

地僻塵紛靜重門晝不開虛庭團竹樹曲逕換莓苔堦  
下無人過窓前有鶴來自焚香炷坐吟賞謾徘徊

海棠花

空谷有佳人天然態度真楊妃春睡足西子曉粧勻露  
浥臙脂濕風飄綺縠新漢宮遺恨在應復怨花神

牡丹

新曲傳供奉名花擅洛陽  
風神應國色標格自天香  
百草皆為隸孤叢特擬王  
沈香亭在否今古笑三郎

秋日牡丹

萬木皆蕭索何緣有此風  
飄香同桂子斂色陋芙蓉  
露冷春容在霜清曉睡濃  
悲秋嘲可解莫妬宋詞工

冬日牡丹

衆芳搖落後雪裏見春紅  
煖律回寒律東風占北風  
林

空香作陣葉落錦成叢擬與梅花匹都忘富貴中

杜鵑花

東風啼蜀魄血淚染花深帶雨眉猶蹙迎風力未禁飄  
零今日怨忘化昔年心萬里無兵火根應返鶴林

葵花

花開如木槿照水更依牆淡白偎深紫輕紅間淺黃傾  
心臣職分注意道家裝肯被鉛華沈隨風近紫陽

水仙花

仙娥遊水府肌骨是耶非解佩逢交甫凌波訝宓妃清  
風常洒洒香雪自霏霏不作人間夢湘魂一片飛

夏曉

驕陽將出海斜月淡無光檻竹搖風細池荷浥露香轆  
轤鳴曙井褰幃促晨裝徙卧南榮下居然枕簟涼

晝寢

一枕竹方床蘊蘊午夢長黑甜聊自足清苦為誰忙石  
晷移時刻金爐冷篆香黃梁猶未熟人事幾興亡

春雨

雨絲池水上雲片屋山東  
漉漉簷花落盈盈地脈通  
搖村江柳綠照檻苑桃紅  
入夜蛙聲急田家報歲豐

擬元日立春

甲子開元旦春深轉斗魁  
初筵浮栢葉急管動葭灰  
宇宙真陽始山川淑氣回  
青絲兼綠勝節物自相催

送春

青帝收春律中宵法駕旋  
暖風芳草渡細雨落花天  
深

樹迷蝴蝶空山叫杜鵑一樽從此別相見動經年

春宵

宮壺傳漏刻刻刻價非輕楊柳風初軟梨花月正明秋  
千微有影檀板寂無聲怪底長門內通宵夢不成

村行書事

結屋臨流水柴門薜荔牆四山松葉碧一徑菜花黃草  
軟牛羊卧炊新麥豆香鄰翁閒聚處濁酒話農桑

聽康都閭彈琴



金爐香篆裊玉軫韻鏗然玄酒真無味清商不在絃帶  
霜鳴候鴈和月瀉寒泉一曲猗蘭古將軍妙莫傳

送鄧二南還

西來情欸欸南去計匆匆走馬辭關右看山過洛中江  
湖千里隔池館幾時同親舊風流少長歌渭水東

始與晉卿先生茶話

千里神交久新來始識荆關山多宦迹湖海重詩名瑞  
世祥麟出朝陽彩鳳鳴外臺知暫駐雙佩早朝京

南園對景偶書

南園風色暖二月已回春宴笑皆文士過從少俗人檻  
花紅已遍庭草綠初勻富貴非吾事韶光過眼新

送郭上舍使雲南回京

乃祖吾藩相而孫上舍生一門賢子弟三輔舊家聲焚  
道羊腸險秦關馬足輕聖朝科目重莫負讀書名

漢中八景為朱景雲憲副作

漢臺春望

卷四  
炎漢興王地千年尚有臺江山猶似昨人事重堪哀鳥  
向離宮沒花從舊苑開不知東向日誰塞漢中來

將壇晚眺

上將壇猶在荒涼帶夕暉興劉功不賞滅項事成非徹  
說真難奪穢謀可獨歸自王疑莫解沉復與期違

韓溝曉月

蕭相追韓處遺蹤尚可攀拏雲龍易失出桺虎重還曙  
色催飛騎清光照壯顏向來非國士何意出秦關

漢山夕照

薄暮山逾好，凭高眼界空。  
嵐光真可掬，倒影抑何窮。  
萬壑澄江紫，千林帶葉紅。  
行人思往事，立馬問褒中。

中梁古刹

寶色風霜古，顏簷老瓦催。  
碑文多剝落，山勢獨崔嵬。  
宿鳥驚還定，遊僧去復回。  
人間經幾劫，地下有餘灰。

諸葛遺墟

大將星初殞，長城一夕空。  
山川消王氣，天地老英雄。  
分

鼎徒遺恨揮戈未奏功猶疑龍尚卧高塚夕陽中

龍江過雨

浩浩長江水滔滔日夜流雨添千里潤涼送一天秋灘  
響山疑動沙明岸欲浮襲人花氣重點點撲行舟

棧閣連雲

秦蜀元相隔何年鳥道開登天窮險阻構木鑿崔嵬蒼  
狗依巖宿青驄自隴來安危真可念須仗濟時才

人日喜晴

浹旬陰忽散樓雪盡融城花縷迎新快梅粧帶艷明最  
靈今日兆偏勝往年情更喜兒童唱家家醉太平

探春

天上星杓轉東園景若何漸看生意滿頓覺賞心多淺  
碧山舒黛新黃柳破鵲催花人火急不惜馬蹄過

西園池亭

池亭閒坐久煩鬱頓消除水氣侵衣薄山光入座虛淺  
沙眠白鷺細藻躍金魚最喜無塵雜吟哦趣有餘

雨過

旭日初開霽東風積雨過一溪新水漲滿地落花多山  
色明於畫鶯聲巧似歌休嗟春事去亭沼漸清和

九日遇雨

登高何處是風雨苦相仇人比黃花冷山橫翠黛愁隔  
宵淹去馬繞塢聽鳴鳩醉把茱萸看憑誰共倡酬

井

鑿地牽泉脈冷然百丈清細涵天色杳倒浸月華明啟

鑰通銀檻沈絲下玉嬰詩人多肺渴頻聽轆轤聲

杜日

杜鼓年年響村醪處處同物豐人自樂賽盡蜡還通庭  
院來巢燕江湖叫塞鴻炮羔兼牒膾隨地得民風

塵

漠漠旋空起花前柳外揚長途隨馬去近市逐人忙雨  
浥天街淨春生輦路香元規何處避唯有水雲鄉

次韻山陽道中



歲晚勞行部千山及萬山使旌紆雪裏候吏立沙間路  
滑心常駭詩成興不慳眼前梅與竹聊慰客中顏

頒賜新歷

皇明開泰運太史獨前知文軌同堯象璇璣用夏時襲  
歲歸祖廟拜舞受堦墀何幸連黃派年年覩盛儀

丙辰元旦試筆

歲德又逢辰龍飛第九春青陽回鳳歷玉燭轉鴻鈞禹  
服河山舊堯天景物新太平今有象共作太平人

送袁推府膺薦之京

行行上玉京得意馬蹄輕  
烏府徵書急黃堂獄訟平  
子容人頌德若水史垂名  
會入端公選應教一道清

聽雨不寐

風送簷花落沈沈聽轉更  
銀缸留濕燭玉漏滴寒聲  
謫戍魂先杳懷人夢未成  
杜陵當此夜醉咏動高情

春日過杜曲從臣指言唐杜拾遺故宅在此今不可尋矣

此日終南道春風動物華雲連千隴麥霞爛一川花林  
杪穿馴鶴池塘沸亂蛙茅茨接烟火誰是拾遺家

郊行

曉行東郭外月色尚平分老栢迷深寺新花對古墳野  
烟隨霧合漁唱隔溪聞滿眼皆吟趣歸來欲夕曛

即事

朱簾常晝捲偏是愛風光雨過蘼蕪濕風來杜若香拍  
酣晴蝶醉課急午蜂狂一笑詩成處陶然倒玉觴

詠黃蓮花

水花分別種紅白敢爭妍南國靈根老中央正色鮮宮  
妃重入步院吏誤相傳安得濂溪種移來共歲年

過東軒墓

中却中山酒長眠竟不醒脊令悲夜雨鴻鴈落晨星冢  
樹連雲暗園蕪帶露青空餘絲竹在地下杳難聽

漫興

終南誰是主分守愧明時曹植非吾友劉蒼是我師有

園惟種竹無日不吟詩入夜重門合天心月上遲

送張斷事考績嚴太守代求

早通三尺法戎幕擅才猷名喜中丞薦詩煩太守求清  
風生狴犴高論動貔貅好去燕山道重來覓舊遊

愚

大塊徒生我蚩蚩無所知放魚誰逆詐失馬未為癡  
綺聊遮煖膏粱不苦饑惟應有詩癖句拙可能醫

嬾

習嬾真成嬾年來嬾更便杜門非寡合隱几即閒眠倦  
洗牕前竹牖聽石上泉不知塵境外可有嬾中仙

拙

散人無所事竟日避紛紜甘比催科政思追乞巧文何  
須繁似露馬用變於雲莫笑鳩呼婦閒中最喜聞

狂


口竭西江水乾坤信所之草髡張旭髮醉炙郭舒眉撫  
掌高歌處掀髯大笑時鳳兮今不返且和接輿詞

五言排律

賀致政王少府九十之壽其孫黃門求

賢闕稱俊乂縣佐著能為平易民心悅公廉士論宜蘭  
亭追往事松逕賦新詩倦鳥投林早門雲出岫遲江濤  
翻浩蕩舟楫脫艱危德貴陰施者天其默相之瞿曇真  
有識餘慶已先知跡隱青山舊堂開綠野奇三槐承世  
澤一桂發孫枝鳳味依金闕鵷行接玉墀芳名歸月旦  
遐筭逾期願奉使還朝日稱觴獻壽時希聲歌白雪妙

舞間朱絲況際雍熙世何歡可代茲





小鳴稿卷四